



75-100









PETRI BURMANNI
O R A T I O
I N
HUMANITATIS STUDIA.

H A B I T A

A. d. VIII. Februarii MDCCXX.

Cum magistratu Academico abiret.



LUGDUNI BATAVORUM,
Apud SAMUELEM LUCHTMANS, 1720.

Digitized by the Internet Archive
in 2018 with funding from
Getty Research Institute

PETRI BURMANNI O R A T I O

I N

HUMANITATIS STUDIA.

SUO unumquemque studio duci & delectari, inter omnes satis constat; neque facile hominem invenias, qui non illa, quibus se excellere putat, omnium rerum prima, se vero, qui ea possidet, pulchrum & beatum esse arbitretur. Neque indoctam modo multitudinem, & illiteratos artifices caeco erga sua opera amore auferri, sed ipsos, qui superbo sapientiae & doctrinae titulo se à vulgo segregant, hoc communi morbo ita adfectos esse videmus, ut cum aliarum contemtionem suas semper disciplinas extollant, & tamquam unicas filiolas exosculentur. Si vero in causas inconcinnae & absurdae ostentationis penitus introspeciamus, paucos certa persuasionem de se & suis vera praedicare, sed plurimos aliarum artium ignorance peccare, alios cupiditate, ambitione aut avaritia abreptos, sua commoda & ra-

tiones veritati praeferre, & pro solida laude vanissimae gloriolae umbram consecrari, deprehendemus. Quotus enim quisque reperitur, sua laudans, aliena culpans, qui ita in omnium rerum variam & multiplicem cognitionem, ejusque interiores recessus, penetravit, ut, singulis inter se comparatis, verum unicuique pretium statuere, & uni prae alia admirabilem quamdam excellentiam adsignare possit? Immo quotus quisque non plebeja potius trutina, quam aequa artificis statera ita omnia propriae scientiae momenta examinavit, ut ad illam, quam sequitur, probandam & praeferendam, certo judicio & ratione impulsus se esse, aliis persuadeat? An non maxima eruditorum portio, si simpliciter & id quod res est eloqui vellent, inconsiderato se impetu, parentum & amicorum auctoritates secutos, in illas se toto animo doctrinas dedisse fateri cogerentur, quae vel ad ingenii illustrioris famam, vel ad honores capiendos, vel ad rem faciendam, accommodatiores aliis ostendebantur? quibus deinde, cum serum est eas dediscere vel mutare, tam certis & destinatis sententiis se addicunt & consecrant, ut etiam factioso furore partes semel temere susceptas defendant. Cum vero post levem saepe & exigui temporis operam eas profiteri & exercere festinaverunt, è re sua esse ducunt venales pro-

proponere, & tabernam non utilibus tantum & necessariis, sed fallacibus & fucosis mercibus instruere, quas omnibus lenociniorum illecebris commendent. Quid? an non ipsos hos bonae mentis mercatus, ad quos rerum imprudentes juvenes magna contentione confluere solent, confusis & inconditis institutorum clamoribus resonare audimus? & ex hujus cupiditatis fonte, tamquam rivulos, tot gloriosas orationes defluere videmus, quibus mercatores graviorum, ut ajunt, disciplinarum incautos adolescentium animos invitant & adlectant, ut praeteritis humiliorum artium fellis, apud suas officinas deversentur, & expositas ibi doctrinas ad utilitatem & necessitatem nundinentur? Quis vestrum A. hoc sacrarium initurus, ut publice verba facientem Professorem audiat, aliud animo suo praecipere solet, quam ut illi, de suae disciplinae antiquitate, praestantia & praeter ceteras dignitate declamanti, defatigatas pervulgato argumento aures leviter, cum unius horulae jactura, sit commodaturus? praesertim cum in illas eruditionis copiae sint redactae angustias, ut raro alicujus scientiae Doctor regni & scholae suae fines & terminos egredi vel audeat, vel possit. Sed ne in ipso statim orationis limine insolentem & acerbam laudatissimarum artium censuram exercere videar,

dear, ambitiosae hujus ostentationis in primis Humanitatis & Elegantiarum Professores reos agere non dubitabo; meque ipsum, inter illos, qui populari blanditia & assentatione discipulos undique corrogare, eorumque benevolentiam colligere nituntur, non ultimo loco esse collocandum, fateri non erubescam. Non pudebit hodie prae me ferre, eum me aliquando fuisse, qui meditato & exquisito sermone, Linguarum, Eloquentiae, & Historiarum laudes amplificare, & magnum aliquid & praeclarum esse, Graece & Latine scire, dicendo efficere sum conatus. Sed aliquot abhinc annis totus mihi displicere coepi, & consilii à primis annis capti pervicacia, & ipsae illae, quas olim juvenili dicendi licentia, & vincendi magis quam veritatis studio habui, orationes maturiori aetati incutiunt ruborem. Irascor mihi, quod à mei ordinis & studii viris persuaderi mihi sim passus, nihil ad omnia tempora utilius, nihil ad vitam privatam & publicam elegantius, nihil ad laudem & famam praestabilius inveniri posse, quam mentem interioribus literis excultam & perpolitam habere. Indignor dictatoria illa magistrorum, quos sequebar, praecepta fecisse atque effecisse, ut illi togatorum ordini me adscribi sustinuerim, qui ex primo, quem obtinere solebat, loco detrusus,

vix

vix infimum, quem precario possidet, hodie in Aca-
demiis tueri potest. Quotidie stomachari non desisto,
eam me vitae meae legem dixisse, ut perpetuo inter
Grammaticorum & Criticorum subsellia sit consene-
scendum; neque ausum fuisse majora spirare, aut prin-
cipibus inter eruditos viris adnumerari ambivisse. Cu-
jus doloris & poenitentiae ut plenissimam hodie Vobis
A. fidem faciam, non tralatitio circulatorum more,
qui jam per omnes cathedras pervasit, merces meas
jactabo & excutiam; nec orationem conquesito ex Rhe-
torum officinis pigmento adspargens, de literarum,
quas profiteor, utilitate & praestantia insolenter glo-
riabor; sed vineta mea cadere, & aperto, sed atroci
stilo, omnia Humanitatis studia, quae sua & docen-
tium culpa merito jacent, confodere; eorumque non
modo difficultatem, vilitatem & minime fructuosam
sterilitatem, sed funestam in primis contagionem, &
periculosam graviorum disciplinarum cum illis societa-
tem ostendere decrevi. Quod si dicendo consequi,
aut rationibus ullam hujus propositi partem cordatis
persuadere nequivero, redundet haec quoque infelici-
tas in futilium artium cultorem, qui, cum Eloquen-
tiam profiteatur, ne id quidem, quod omnes fere se-
quuntur & probant, evincere valuerit. Quamvis au-
tem

tem maxime mihi laetandum sit, apud illos agendi occasionem oblatam, qui non modo in eadem opinione versantur, sed illam omnibus, qui se ad eos adplicant, induere conantur, praecipua tamen me spes tenet, non plane inefficacem apud vos, facillimi Adolescentes, Orationem futuram. In praejudicatam illico vos sententiam ituros confido, ubi perspexeritis, quam proclivi ad sensu consilia vestra & parentum rationes comprobare laborem. Ubi recte & ordine vos facere pronuntiem, si dimissi à manu & ferula paedagogorum, barbatis senibus auscultantes, haec plebejæ caveae subsellia transcendatis, & saltu in orchestram facto, noxias pietati, famae, eruditioni & arcae literas, quae humanitatis nomen mentiuntur, relinquatis. Quo non favore, quo non adplausu me dicentem prosequimini, si ostenderim, neminem vestrûm ad aliquam nominis celebritatem aut fortunarum incrementum, si ve inter cerimoniarum antistites, si ve justitiae sacerdotes, si ve salutis humanae custodes, si ve sapientiae magistros adspirare posse, qui se nostris studiis inquinandum permiserit. Ad quod probandum, non auctoritates & exempla, quae in obvia & domestica copia cumulare esset putidum, undique conquiram; sed leviter per singulas disciplinas pervagando, populari &

& pervulgata argumentatione Acroaterii hujus approbationem captare studebo.

Omniū, quotquot sint, doctrinarum principem & reginam esse coelestium rerum meditationem, nemo, qui quotidianis sermonibus celebrari audit, diffiteri sustinebit: Eamque jure suo primos honores occupasse, & reliquas, ut administras & comites, ex alto despicere, neque earum ope & adjumento indigere, nisi cum placuerit ancillas in partem vilioris operae & laboris vocare, in controversiam vocari nequit. Fastidiosa in primis domina cavere studet, ne temere in ejus adyta & sacra irrumptur, neque initiandi spem facit, nisi illis, qui mentem purgatam, & sublimioris scientiae capacem ad sacra sua attulerint, non terrena faece pollutam, non humanis sordibus contaminatam. Duo vero dominatricis disciplinae principia & fundamenta, quibus tota nititur, à sacrorum mystis prodita esse accepimus; divinam primum auctoritatem, libris & tabulis, ab ultima antiquitate transmissis, consignatam: summam deinde in divinae mentis & doctrinae interpretatione concordiam & conspirationem, non quidem omnium, sed pietate & doctrina illustrium virorum, qui in unum conducti, post diligenter existimatam & omnibus momentis suis ponderatam Dei legem, cer-

B

tam

tam & definitam publicae persuasioni prodiderunt regulam, ad quam omnia judicia dirigantur, qua vera & falsa dijudicentur; ultra quam citraque consistere nulli liceat; aut semel decreta refigere vel convellere permittatur. Ad haec duo facillima & expedita doctrinae capita qui studia & lucubrationes exegerit, numeris omnibus absolutus divinae sapientiae interpret habetur. Artes vero, quae ad humanitatem pertinent, licet variae doctrinae ostentatores in infinita membra concidere soleant, nos tamen hodie ad quatuor species revocabimus, Grammaticae primum & sermonis antiqui cognitionem, temporis deinde prioris & Historiarum scientiam, tum Eloquentiae exercitationem, Criticam postremo de omnium operibus dijudicationem. Quae singula & universa, non dico pernoscenti, sed delibandi etiam, humanae industriae spem esse desperatissimam omnes uno ore confitentur, & si jam ea esset ingenii vis & laboris vehementia, ut per eas procedere quis posset, minime tamen frugiferam esse, quae illis insumitur, operam, aut aliquid inde praesidii aut ornamenti sacris studiis accedere; sed disciplinae à Deo proditae, & concordibus suffragiis comprobatae auctoritatem praecipue inde convelli & labefactari, nunc erit ostendendum.

Trium

Trium vero, ut inde incipiam, gentium, Hebraeae, Graecae & Latinae ab eruditis linguae celebrari solent, quarum singularum cognitio non modo difficilis & laboriosa, sed ab omni perdiscendi spe deposita & destituta. Si quis enim ad Graeci vel Romani sermonis intelligentiam ita unice incumbere vellet, ut eam plane adsequatur, vita eum prius, quam labor & materia deficeret. Ridenda enim potius, quam confutanda eorum est gloriatio, qui tam scite, tam eleganter se utraque lingua scribere & loqui posse jactant, ut si in antiqua tempora redeundi, & Athenis vel Romae illis verba faciendi facultas daretur, non minores se Demosthene vel Cicerone plausus relatores esse confidant. Modestius & verius de hodiernis conatibus illi existimare videntur, qui eloquentissimos hodie, & nitore orationis praeter ceteros insignes, tam barbaros, tam inelegantes prae antiquis esse censent, ut, cum vix millesimam earum linguarum partem sint adsecuti, neque vernaculam dicendi urbanitatem, neque veram pronuntiandi rationem pernoscant, digni forent, si in Arcopago, vel pro Rostris os aperire auderent, qui mulierum & puerorum sibilis exploderentur. Quae cum earum, quae nondum plane conticescunt, & quae tam expressa sui vestigia reliquerunt, linguarum sit con-

ditio, quis tam improbus, ut umquam Israëliticae, plane emortuae, & quae praeter unicum veteris sermonis monumentum nihil nobis transmisit, cognitionem se adsecuturum speret? stultus ergo & inanis quicumque illis linguis, ultra prima elementa, à sacrae doctrinae studiosis labor impenditur, qui numquam ad metam attingere, aut attendentibus operae pretium perolvere possit. Sed demus eo vesaniae aliquem progressum, ut omnes adolescentiae annos in longa linguarum commentatione perdere voluerit, quid deinde, ubi ad divinae doctrinae meditationem accesserit, ornamentum, aut subsidii adferre poterit, nisi tenuem, & splendidum magis quam utilem apparatus, & quem nullo negotio aliunde mutuari potuisset? Architectos mihi & fabros respicite, qui stupendis operibus & substructionibus in admirationem ingenii & sollertiae spectatores rapiunt, an hi quoque tyrocinii, velociter labentis, annos inter eorum, qui servili opera ferramenta & fabrilia instrumenta fabricantur, fellas inutiliter consumunt? Immo vero recta potius se ad aedificandi & architectandi disciplinam adplicent, quam cum perceperunt, ex viliorum opificum tabernis necessariam arti suae suppellectilem comportant. Imitemini, divinae sapientiae candidati, fabricatorum pruden-

dentiam, & temporis, rei pretiosissimae, jacturam metuentes, adventitiis & commodatis ex aerumnosa Grammaticorum officina copiis vires domesticas firmate. Nec Panico terrore trepidantes dubitate, ubi, periculo in literis & linguis facto, in sacrum ordinem cooptandi eritis, quin satis scientes prisci sermonis, satis literati, gravissimis patrum confessoribus existimini, si post aliquot hebdomadarum meditationem, adjumento Lexicorum & Grammaticorum, minutissimam sacri portionem legere & explicare vos posse ostenderitis. Hoc vero enavigato freto, hanc praetervectis Charybdim navem subducere, & tamquam in tutissimo portu, apud lixas & calones vernaculos deversari licebit, qui immensae & redundanti praeconum turbae uberrima quotidiana loquacitatis pabula, & perennem concionandi materiam subministrabunt. Nec inutilem modo, sed noxiam in primis esse sanctissimae religioni elaboratam nimis linguarum peritiam, inter mystas est exploratum. Quid enim non audet, quid non committit profana Grammaticorum manus? Syllabas, verba, dictiones, universum Orationis ambitum, in omnes partes versare, nulli interpretationi, constitutae licet & comprobatae, acquiescere, jactare alienum stuporem, suam perspicacitatem, qua se plus

videre antiquis, & novam verborum vim primos eruisse gloriantur, pervulgata Paedagogorum est consuetudo. In Hebraico codice, unico dubiae & incertae linguae monumento, plurima esse sine exemplo vocabula; hominum, animalium, herbarum, utensilium, & nescio quarum rerum appellationes obscurissimas, & nemini perspectas; nullum etiam inter ea, quorum ratio certior esse creditur, verbum esse aut locutionem, quae non probabili disputatione diversum quid significare possit, acriter contendunt. Omnes ad hujus sepultae & oblitteratae linguae intelligentiam aditus ita esse obstructos & impeditos, ut ipsi illi, qui Esra & primariis Synagogae antistitibus plus sapere videntur, interpretes, in Israëlitarum monumentis prae tenebris & caligine tactu potius quam sensu obversentur. Nihil ergo proderit ingenii ad coelestia evolantis vires puerili & inani occupatione deprimere, quae licet assidua & vehemens, numquam ad confessam & apertam verborum obscuriorum & sententiarum explanationem studiosum perducet. Clamet ergo, & contendat impia fere & sanctae linguae inimica Grammaticorum caterva, eadem via in tabulis divinis, & vatum voluminibus interpretandis esse incedendum, per quam in Homeri aut Virgilii verbis exponendis Grammatici discipulos

pulos suos producere consueverunt: & unicam verum, & qui scriptorum mentibus fuit obversatus, sensum eruendi superesse rationem, quae ex vera origine & vi verborum, linguae olim vigentis ingenio, & usitata loquendi consuetudine initur: omnia illa subsidia in hujus linguae meditatione deesse nemo infitiri potest. Aliam igitur & longe uberiolem, simulque facillimam, divinae mentis explanationem aperiant & ostendant sacerdotum scholae, quae non ex Grammaticorum obscuris & controversis legibus, sed ex comparatione receptae persuasionis, & peraequa oraculorum proportionem, Dei & sacraiorum voluminum mentem declarabunt. Ignorasse feliciter Hebraeorum linguam prima Ecclesiae florentissimae secula, quibus sine ejus ope doctrinae certae dogmata fuere constituta, & repetitis Conciliis capita comprobatae religionis formulis numquam temerandis consignata. Nec magis instructos ab Israëliitarum sermone fuisse Latinae Ecclesiae antistites, eosque nullo, aut exiguo cum Graecae linguae usu, acerrimos veritatis propugnatores exstitisse, & subsidio versae in vernaculum sermonem scripturae, diversa sentientes felicissime refutasse. Majus quoque & ardentius plebi & mulierculis injectum fuisse pietatis studium, cum neglecta sterili & sicca verborum & sententiarum inter-

pre-

pretatione , communes & pervulgatae veritates ex quibuscumque divini codicis verbis confirmarentur. Videatur hoc prodigio simile omnibus, qui his mysteriis non sunt initiati; verum tamen exitu & rebus deprehenditur, Academicae juventutis & plebis doctores, sine exquisita linguarum intelligentia, expeditius & promptius tenebricofas sacrorum oraculorum obscuritates & aenigmata enodare, & ad causam suam trahere, quam qui omnem in excutiendis & versandis antiqui sermonis reliquiis aetatem contriverunt. Sudent, laborent, fatigentur, ungues rodant, & caput scabant Grammaticorum Coryphaei, scriptis, quae ex antiquitate supersunt, perplexis & ambiguis impallescant & infenescant, Vobis, divinorum responso- rum interpretes, nec modo veteranis, sed qui vix prima elementa didicerunt, tironibus, benignitatem numinis sentire datur, & gratias immortales agere licet, quod tam uberes, tam redundantes scriptis vatum suorum infuderit sensus, ut iis in omnes partes versatis, quidvis inde effici possit. Tentet modo Grammaticus novam & ante non intellectam loci alicujus controversi & vexati interpretationem, illico ut profano, & irreligioso dirae & execrationes intentantur. Vobis vero, sapientissimi Epoptae, multiplices & di-

diversas ad minutissimas sacrati voluminis partes, & versus conjecturas, quamvis ad regulas puerilis artis non sint exactae, neque forte etiam scriptoris animo respondeant, si modo constitutae non adversentur religioni, cumulare fraudi esse nequit. O inexhaustum & numquam exarescentem interpretandi fontem & sca-tebram! quae ad finem rerum conjectorum ora irrigabit, & industriam praeconum felicissimo processione augmento acuet & excitabit. Faceſſat ergo omne sermonis prisca ſtudium, & cum tanta diligentia & religione in domesticas divina oracula tranſierint linguas, ad eas addiſcendas, ornandas, & augendas, tota mente incumbite, coeleſtis ſapientiae candidati, & earum miniſterio in novae ſemper & admirandae doctrinae theſauros vos inſinuate; ita temporis, ita laboris, ita impenſarum ingens compendium facietis.

Sed quid diutius exilis & moleſta de vocabulis & diſtinctionibus nos contentio moretur? ad res potius & facta adgrediamur, & quam difficile, quam inutile, quam calamitoſum fundo divino ſit hiftoriarum ſtudium, quod per veteris aevi memorias, & omnium populorum annales pervagetur, videamus.

Quicumque ex vero, non venditandae mercis gratia, de Hiftoriarum ſcientia diſputare inſtituet, certis
C
qui-

quibusdam praeceptis viam futurae doctrinae praemunire debet. Nihil scilicet fide historica esse fallacius, nihil in rebus humanis incertius fateri non erubescat. Praemoneat nullum nobis, cujuscumque seculi vel gentis, superesse scriptorem, cujus memoria non fuerit infirma, ingenium minime omnium doctrinarum capax, prudentia rerum civilium parum consummata. Quosdam amore patriae, aut sacrorum à majoribus traditorum veneratione, ablatos, nonnullos factionum studiis, aut credulitate à vero deductos. Multos famae & nominis cupiditate mirabilia magis, quam vera condidisse. Illos mercede conductos, hos animi & voluptatis causa splendide mentitos; non paucos regiae Majestatis turpissimos assentatores, Principum facinora & superbos dominantium mores heroicarum virtutum specie velasse; contra libertatis & licentiae popularis patronos, prae immodico in reges odio, civitatum suarum fastos falsis laudationibus vitiasse. Judaeorum fabulas, Graecorum levitatem & mendacia, Romanorum in praedicanda pietate & justitia bellorum, & in dissimulandis omnibus, quae turpem Principi populo notam inurerent, infamen diligentiam; denique omnium nationum, aliis se priores & meliores jactantium, ambitionem numquam satis auditorum oculis &

men-

mentibus exponere & denudare potest. Ita ut Historias qui docet & discit, ipsis illis, qui olim Pyrrhonis, aut nuper Cartesii scita probarunt, acrius contendere debeat, de singulis & universis, quae narrantur, factis esse addubitandum, donec certis & perspicuis indiciis se veritas producat. Ita imbutos & praeparatos adolescentium animos à primis humani generis conditoribus, per tenebricosam primum fabularum caliginem, deinde per ambiguas & dubias regnorum successiones, ad liquidioris fidei monumenta suspenso & cauto gradu quidem deducere magistrorum sunt partes: verum non tantum in obscuris & incertis, sed in auctoritate multorum seculorum comprobatis factis haerere; ad singula, quae suspiciosa videri possunt, consistere; ad minimum quemque scrupulum offendere; & dubitandi occasionem injicere; quid, quaeso, aliud est, quam ubi in divinis annalibus, electae à Deo, & à gentibus segregatae nationis seriem evolvere incipient, praemonere simul, non certiore fide Israëlitici populi, antiquissimi omnium, fata, quam reliquorum esse publicis literis mandata. Quid vero futurum, ubi Hebraeorum annales, quibus praecipua nobis est constituenda auctoritas, non semper cum peregrinorum fastis amice consentire audiverint? Ubi inextricabiles illi no-

di de Affyriorum, Babyloniorum, Medorum & Persarum dominatione juvenum animos implicuerint? nihil jam dicam de confusissima temporum doctrina, quae à quibusdam ad Hebraeorum, ab aliis ad Graecorum computationes exigitur, & tot spinis & sentibus est obfessa, ut si tota hominis vita in calculis ponendis & subducendis insumeretur, numquam ratio ad liquidum perducì, aut exitus ex labyrintho tam inexplicabili dari possit. His jam adde, quae non historiarum, sed in primis graviorum doctrinarum Professores publice praedicare solent; plurima ex praejudicatis opinionibus, non propriis, quibus artifices sua dogmata enuntiare solent, verbis esse expressa; sed sermone populari, quo specie rerum decepta, aut superstitionibus adligata multitudo inter se conferre solet. Rerum naturalium causas, solis, & siderum cursus & motus, & similia, non ex decretis sapientum, sed ex incerta vulgi persuasione, & fallaci oculorum & sensuum fide saepe enarrari. De Deo, cujus vera vis & natura à nullo intellecta fuit, notiones humanis mentibus & corporibus similes informari; ejusque & administrorum, quorum etiam conditio & ingenium nulli est exploratum, praesentiam, licet veram & indubitatam, modo tamen nostrae menti non percipiendo ostendi.

Prae-

Praejudicare quidem illam & exemplum dare familiari Daemonum inter homines obambulationi, nihilque obesse, quo minus, imperante Deo, impuri illi spiritus se in cognitiones nostras infinuent; incredibile tamen morosis naturae interpretibus accidere videmus, damnatis ad aeternas tenebras & carceres Dei & hominum hostibus, majorem saepe vim & licentiam humanis actibus interveniendi, quam beatis & laetabili Dei luce & adspectu fruuntibus Geniis, concessam. Quidquid vero de eo inter sapientiae humanae Professores disceptetur, hoc inter omnes, qui antiqua & nova rerum gestarum monumenta tractant, constare, omnes historicos, ubi de Daemonibus, prodigiis, ominibus & portentis, quae timidae plebis animos concutere solent, sententiam ferunt, per veritatis certae ignorantiam in maxima opinionum inconstantia versari. Acutiores, & quibus res, aliis temere creditae, semper suspiciosae videntur, Daemonum species, larvas & nocturnas umbras, manes ex inferis excitatos, Magorum conjecturas, somniorum interpretamenta, inter plebis deliria & aniles fabulas referre; obtusioris vero ingenii, qui omnia fieri posse facile & pie credunt, quibus nec licet, nec vacat unamquamque rem examinare, non dubitare, quin Daemones, eorumque administri, Magi, au-

gures , conjectores , haruspices , & sacrificuli futura , ita volente Deo , habeant exploratissima ; horumque omnium expressissima nobis in divinis paginis existent vestigia. Somnia interpretandi disciplinam , si non perfectam & certissimam , aliquam tamen fuisse. Auspiorum usu quidem interdictum populo Israëlitico , non vanam tamen eorum fidem & auctoritatem diversis gentibus , adjuvante superstitionem Daemone , nec intercedente Deo , fuisse. Functas vita animas ope Daemonum cieri & evocari posse , Samuelis ab inferis excitati exemplo manifesto constare. Quae omnia infirmare & irridere , quid , quaeso , aliud , quam adjuvare impiorum de sacri voluminis certa auctoritate , & scriptorum sinceritate & fide , suspiciones ? Haec fraudibus sagarum , vel civili sollertiae adtribuere , quid aliud , quam per ingenii liberioris , & nulli magistrorum addicti , causam , se justo alieniorem à fabulosis narrationibus ostendere ? quid aliud , quam inscitiam , temeritatem , impudentiam , & in novas opiniones , earumque auctores proclivem propensionem prodere , nec modo profanis , sed divinis historiis fidem abrogare ; non argumentis pervulgatas opiniones refutare , sed ipsam omnino religionem ex animis hominum delere ? Quid aliud , quam verae religionis propugnatoribus

ribus omnia arma & tela eripere, quibus regnum illud vastissimum Daemonum & ejus satellitum evertere fortissimi athletae consueverunt? Cui bono & usui perplexa illa & ambigua oraculorum veterum responsa astutiae & avaritiae sacerdotum adsignare, & principem Daemonum de throno, quem, Deo permittente, posuit, deturbare? Nonne hoc est per infelicis tenebrarum principis latus Deum fauciare, & dum praedictiones Pythiarum & conjecturas Chaldaeorum & hariolorum impugnare se simulant, omnem divinarum vaticinationum vim & veracitatem infirmare? O intolerandam omnia infirmandi libidinem! O perniciosam & exempli metuendi confidentiam! permitti forte in judicandis Graecorum & Romanorum ambitiosis narrationibus superbum fastidium posset, sed easdem de annalibus sacris suspiciones juvenum mentibus injicere, impium & execrandum. Nec tamen his finibus omnem historiarum veterum fidem evertentium temeritas consistit; sed quum odii publici & Eumolpidarum saepe metus sacrorum scriptorum obtrectatores cohibeat, omnem impetum vertunt in venerandos historiae Ecclesiasticae conditores, qui coetuum Christianorum dissidia & contentiones de doctrinae capitibus literis mandarunt. Non solum illis comparare gen-
tium

tium impiarum & externarum historicos, sed ideo fere praeferre solent, quia ferociores & infestis magis animis bestias concurrisse, quam Christianos negant, & nullo discrimine aetatis, dignitatis, aut doctrinae, in consortes sine exemplo saeviisse narrant. Annalibus vero Christianis fidem detrahunt, quia integerrimorum famam calumniis & mendaciis deformasse, & memoriam posteritati detestandam reliquisse; nequissimorum vero, sed qui vultu rigido & habitu acquisito sanctitatem mentiri didicerant, scelera & importunitates non modo dissimulasse, sed ipsos fallaciarum & scelerum architectos amplissimis laudibus elatos, coelo & Divorum ordinibus adscripsisse, se probare posse arbitrantur. Praeterea in vulgus ipargere non erubescunt, sub infami impietatis & haereseos, ut vocare solent, crimine, omnes, qui sacerdotum dominationi succedere, eorumque ambitionem, crudelitatem, & avaritiam adjuvare nollent, obruisse. Reges & principes, omni laude & admiratione praedicandos, ut monstra, & à Deo generi humano & ecclesiae pestes immixtas, depinxisse; quia Episcoporum & Monachorum cupiditati modum imponere sunt ausi. Parricidas vero, adulteros, gulae & ventris mancipia, qui leges divinas & humanas conculcarunt, ut exempla pietatis & omnium

vir-

virtutum proposuisse, & immensis praeconiis ornasse, quia, oppressa populi libertate, & cohibita diversum sentiendi libidine, vittatum ordinem divitiis & honoribus auxerunt, aedes sacras, & nebulonum receptacula regis vestigalibus instruxerunt. Quo non dolore commoveri, qua non indignatione irritabiles quidem piorum animos, sed ardore in Dei & ecclesiae causam inflammatos, effervesce censetis, ubi quidquid miri, aut inauditi à Tertulliano, Eusebio, Orosio, Sulpicio, & nescio quibus, acerrimo propugnandae veritatis studio incensis viris, memoratur, irrideri & ludibrio profanis esse ingemiscunt? Quis patienter ferat, tot veritatis testes, qui tyrannorum in inermem gregem saevientium crudelitatem fatigarunt, vel mente motis adnumerari, vel ex fastis ecclesiae deleri. Quis Tiberii consecrandi Christum conatus, quis Hadriani templi Servatori excitandi propositum, quis Philippi Christianam religionem profitentis pietatem, quis Fulminatricis legionis apud Deum potentiam, Thebaeae constantiam & pertinaciam, belle confictis fabulis accenseri non irascatur? Quis Constantini, non tam religionis instauratoris, quam Senatus infulati locupletatoris, ambitiosam perfidiam, dissimulationem, parricidalem furorum, & omnia, quibus pessimi tyranni

D

in

in odia hominum incurrerunt, facinora in fraudem rei Christianae exquisitis illos maledictis infectari; Juliani vero, transfugae & desertoris, eruditionem, clementiam, frugalitatem, patientiam, fortitudinem, castimoniam, & omnes, quibus umquam laudari meruit princeps, virtutes in coelum extollere non stomachetur? Sed quis non exsecretur Historiarum Professores, qui ipsos Romanae urbis Episcopos, sacrilegos illos Pontifices, & juratos Dei & Christi hostes & adversarios, non modo atrocissimorum criminum, quibus eos purior Christianorum pars reos peregit, absolvere, magicarum artium infamiam ipsis detrahere, & pacti cum Daemone initi vanitatem irridere; sed, quod horrendum! ipsam ex Pontificalibus fastis feminam, & parturientem Papam eradere non erubescunt? Quid est si haec non praevaricatio, & causam emendatae religionis adversariis prodere? Sed resisto; metuo enim, si ad propiora nobis tempora series me abriperet, ne infanientes illi veritatis, ut se vocant, adsertores & fabularum expulsores me vehementius conturbarent; & tot non modo incredibilia, sed aperte falsa & ficta, quibus aliter sentientium nomina sunt infamata, etiam hodie tradi occlamarent; & tanto factionum studio nostrorum etiam temporum Praefules saepe exardescere ostendunt.

ostenderent, ut ipsi, qui conventibus eorum interfuerunt, posthac nec oculis nec auribus credendum, nihilque de rebus, quae inter diversarum partium praesides & antistites geruntur, certi & indubitati prodi, me cogerent fateri. Cavete ergo, sanctissimae doctrinae studiosi, ne obstinata illa, nulli, nisi sub certo & iurato teste, credendi pertinacia & labes, quae jam omnes Historicorum scholas infecit, longius serpat; sed ad vitae securitatem, ad religionis custodiam, ad pietatis incrementum, & in primis ad partes firmandas, & ad sacri ordinis venerationem attinere putate, nullam scriptoribus sacris & ecclesiasticis fidem aut auctoritatem denegare. Immo vero, cum illi ipsi, qui Historiarum studia tanto opere & molimine commendant, unicam ex illis utilitatem & fructum redire fateantur, ut Historia sit quasi vitae magistra, quae fugienda & facienda doceat: quid, quaeso, religionis interesse poterit, verane an incerta prodiderint nobis annalium conditores: cum sufficere virtutum praeconibus & vitiorum dissuasoribus debeat, si ita fieri potuisse ostendant. Eadem enim ex fabulis & commentitiis narrationibus, quae ex indubitatae fidei monumentis utilitas redundabit. Majori quoque ardore in pietatis, sanctitatis, liberalitatis, & misericordiae studia exarsisse olim homines

constat, quam nunc, ubi tam anxie in vulgo credita inquiratur, & quondam pia fraude & religioso dolo pleraque conficta esse apparet. Denique quid refert ex vetustate obsoletis voluminibus exempla virtutum & scele-
rum repetere, cum sacris oratoribus ingentes diligentissimorum virorum thesauri hodie ad manum sint, qui undique flores carpservunt, & tantam ex veteris & recentioris ævi scriptoribus materiam & silvam congefferunt, ut inde populo pro concione in longissimum tempus satisfieri; & animi vulgares ad virtutes imitandas, vel flagitia vitanda incendi possint.

Profligata jam levi illa & incredula Historicorum turba, quam facili manu ventosae eloquentiae, & garrulae loquacitatis patronos dispergam & dissipabo? Quae non tela contra lubricae & volubilis linguae jaculatores ex ipso sacri Codicis armamentario depromere, quibus à templis & sacris eos repellam, liceret. Sed, si non ipse doctrinae salutiferae Conditor, & apertissimi ejus Comites & sectae Antistites, populares, & ab omni fuco nudos sermones nobis prodidissent, ipsa religionis simplicitas & sanctimonia, satis in doctrina sua ad persuadendum facultatis, satis in argumentis ad conciliandos animos gratiae, satis ad agendum splendoris se adferre posse admoneret. Quid juvat, inani verbo-
rum

rum apparatu sacra aperta nec recondita involvere? quid lenociniis linguae ad mysteria populo & vulgo jam reclusa auditores adlectare, quos ipsa Dei vis, & efficax doctrinae potentia trahit & impellit? Quid Eloquentiae & Rhetorum praeceptis divinos oratores enervare, quibus coelestis in dicendo ardor robur addit, & demissus ex alto spiritus inflamat? Natura, aliis noverca, huic ordini benigna mater, jam nascentibus eloquentiam induit, & absque ulla exercitatione, modo loqui incipiant, disertos esse jubet. Quae infania, quis furor, destinatam divino praeconio juventutem, profanis dicendi magistris formandam tradere? qui tam arduum, tam longum eloquentiae studium esse mentiuntur, ut vix toti seculo unus eloquens evenerit; neque ex omni temporum memoria praeter tres quatuorve summa dicendi laude florentes, proferre possint, cum tamen unusquisque eorum se optimum esse oratorem sibi persuadeat. Quam absonum, quam absurdum ergo desperatae illorum judicio laudis gloriam consecrari, & hoc Academicum spatium (quod tam laudabili celeritate tribus, summum quatuor, annis decurritur) inutili labore ideo interrumpere, ut ne mediocres quidem, aut tolerabiles oratores censoribus acerbissimis judicentur? clament, quantum velint,

rauci facundiae institores, ineptum esse & inconcinnum, omnem vitam publicis concionibus destinare, neque umquam dicendi leges percepisse: opponant nobis artificum exempla, quorum nemo in collegia artes profitentium, nisi tyrocinii rudimentis depositis, recipitur. Sacrae eloquentiae candidatis hoc praecipui natura, quid dico naturam? divina largitur benignitas, ut quoties velint, eloquentiam incredibilem exserere, & neglectis vanissimae doctrinae praeceptis, non tantum plebi admirabiles, sed regibus & magistratibus terribiles oratores evadere possint. Quoties non, agitante illo, qui intus est, Spiritu eorum corda & pectora incallescere, brachia jactari, manus complodi, pulpita feriri, capita rotari, spumas in ore agi, oculos arde-
re, corpus & membra contorqueri, & vultus in omnes formas variari sacro cum horrore stupemus? quis non erectis auribus in compositos ad dicendum praecones oculos intendit, & rigido primum vultu lacunaria intuentes, & è coelo sermonem evocantes, aut clausis oculis totos in se descendentes, veneratur? mox robustissima voce templa spatiosissima implere, modo teneram & flexibilem, & , in quodcumque torqueant, sequacem frangere & modulari: nunc palato molliter illidere, interdum ranciduli
quid

quid balba de nare tenuare: aliquando flebili suavitate plorabile quid eliquare: nonnumquam jucundo & amabili sono aures mulcere: saepius vero lentissima vocis exilioris productione se in animos insinuare, obstupefcit? Quis mentis suae compos, & non simul cum pullato grege attonari se sentit, ubi vario clamore, cantu, fletu, risu, gemitu, tussitu, screatu, se turbari & in omnes, quas vult Orator, partes versari experitur? Naturalia haec, vel ut verius dicam, coelestia eloquentiae dona, non fictore vultus aut membrorum, non praeunte Phonaeco adsimulata, sed sua sponte nata & usu aucta, aliam dignitatem ecclesiasticae cathedrae, & religioni auctoritatem conciliant, quam compositi illi ad exempla & dictata Histronum motus & conformationes membrorum. Excitent & inflamment actionum mollitia effusas in omni intemperantia libidines in scena Mimi: teneras etiam puerorum, & virginum mentes ad turpium amorum meditationem motibus Iönicis incendunt saltatores; numerosa & effeminata oratione adolefcentes corrumpant Academici declamatores: arguta & veteratoria loquacitate in perniciem clientium, & ad pervertendos iudicum animos armentur caussarum patroni; vos, coelestis eloquii potentissimi oratores, nudam & à Deo commodatam eloquentiam ad
ho-

hominum salutem conservandam , & nefariorum impetus refutandos , sine alicujus invidia exercete.

Quam gravia A. quam funesta ex Linguarum, Historiarum & Eloquentiae meditatione in sacram doctrinam redundant incommoda, audivistis; sed omnia haec ludus & jocus videbuntur, prae letalibus, quae detestanda religioni Critica vulnera imponere non veretur. Haec tyrannidem adfectans, superbissimam sibi adrogat censuram, & tribunal insolenter erigit, ad quod omnes, qui ex tristi literarum naufragio & ruina, vel integri vel dilacerati evaserunt, scriptores, quasi nihil passi essent, obtorto collo rapiuntur. Ausu profano, nullo delectu, importuna haec dominatrix, injecta sacris manu omnia temerat, & polluit. Nec vindiciis adsertorum, nec Pontificum aut Conciliorum decretis, nec praejudicatis Principum aut Magistratuum sententiis cohiberi potest, quin, prioris status controversia omnibus mota, hunc peregrinitatis reum agat, huic, ut dubio parente edito, natales ambiguos faciat, illi, licet patrem adsignet, formam tamen & habitum fucis & mendis inquinatum esse calumnietur. Denique omnes, quotquot supersunt, libros corruptos, deformatos, & interpolatos caussando, pro libidine sua addendo, delendo, emendando ita vexat & excarnificat, ut si ab inferis emer-

mergerent auctores, foetus suos non agnoscerent. Per vos A. me non dicente, cernitis, quam exitiosum hoc sacris codicibus sit opus censorium. Quid enim? doctus Criticus & adsuetus urere & secare, inclementer omnis generis libros tractare, apices, syllabas, voces, dictiones confodere & stilo exigere, continebitne ille ab integro, & ante hanc haeresim natam intaminato, divinae sapientiae monumento crudeles unguis? O animadvertendam audaciam! o suppliciiis aeternis confringendam perditorum hominum temeritatem? Tune, confidentissime alieni operis vexator, divina Moy- sis & vatum, inspirante Deo verba & sententias scripta, & invigilante ejus integritati diligentissimo Pontificum collegio, conservata monumenta, eodem mentis habitu, eadem arrogantia, qua Herodoti, qua Livii aut Taciti pulverulentos & exesos codices versabis? Tu, eodem fato omnes premente libros, vilissimas librario- rum operas, quae Graccorum & Latinorum volumina, lucri studio properata, venalia proponebant, sacris Scri- bis, quorum manus & calamos non minori cura divi- na gubernavit providentia, quam scriptorum mentes, ne in ulla litera vel vocabulo peccarent, compara- bis? Tu, vitio create Censor, ut omnia labefactes, insignes meritis & fama viros, qui renatis literis &

E

in

inſtaurata religione, primi typis deſcripta ſacra oracula in vulgus emiſere, in depravatos codices incidiffe, & infinitis mendis maculatas editiones nobis prodidiſſe affirmabis? Tu, quo major codicum manu exaratorum copia reperiatur, & variarum lectionum numerus magis creſcat & augeatur, eo certius & ſecurius Criticos legitima & vera verba adſerere, & ſpuria ejicere poſſe, contendes? Quanto ad quietem publicam eccleſiae, quanto ad perſuaſionem vulgi ſtabiliendam adcommodatius, ſi confidentiae huic modo impoſito, receptae ſemel, & probatae per eos, qui in vernaculas linguas verterunt, ſcripturae acquieſcere, omnes etiam eruditiffimi juberentur. Providendum eſt & occurrendum invaleſcenti & vires jam maximas, etiam inter ipſos ſacrarum literarum doctores, adſecutae peſti: coërcenda Criticorum infrenis temeritas; adigendus, quicumque ſacris ordinibus initiatur, ſacramento, ut conjuncta cum conſortibus opera adulteratores ſacrorum voluminum diris & exſecrationibus devovere ne pigretur. Munienda ſanctionibus & poenis in vernaculas transfuſa linguas divina oracula: videndum omnibus, ſummis, mediis, infimis antiſtitibus, ne res Chriſtiana detrimentum capiat. Utinam felix illud, & deſideratum votis tempus adfulgeat, quo, ut plebi ſecuritatis exemplum praebea-

beatur, nullus inter sacros interpretes reperiatur, qui vel Hebraeos, vel Graecos, tot discrepantibus lectionibus deformatos, codices respicere aut tractare dignetur: sed, ut strenue jam facere coeperunt, omnes ita domesticis commentatoribus & interpretibus adhaereant & adquiescant, ut nullus posthac depravandae doctrinae ex Criticorum audacia metus suboriat.

Satis multa jam mihi, & nimia fortasse vobis, fecisse verba de labe & contagione literarum humaniorum videri possem, nisi plurimos inter dicendum capita contulisse & admurmurasse animadvertissem, qui fortasse me nescio quid omisisse indignabuntur: & licet optimas sectae meae partes me profligasse & evertisse gaudeant, aliquid tamen ex pestifera humanitate, magis noxium & calamitosum, ad otiosi temporis oblectationem integrum mihi reservasse suspicabuntur. Nullam scilicet Poëtices à me in recensione damnatarum artium rationem esse habitam: quam ideo me forte silentio praeteriisse alter alteri insusurrant, quia, cum aliarum disciplinae meae partium laudes numquam potuerim adsequi, deterritus laboris & operis difficultate, me cum multis ad carminis facilitatem contulerim. Sed, ut verum fatear, A. hanc in artes, mihi olim mirabiliter adamas, orationem molienti, idem e-

venisse, quod omnibus, qui Poëtices illecebris & suavitatem fascinantur, evenire solet, deprehendi; Nec me, licet omnia facerem, & juventutis ille calor deficiens saniora suaderet, amabilem illam insaniam odisse aut relinquere posse, sum expertus. Utinam gravem illum & molestum, ut appellant, Deum pectore meo excutere! Utinam ex animi sententia & efficaci oratione, vobis, quotquot adestis, Poëtae & Poëtaſtri, persuadere liceret, nihil stultius, nihil à communi hominis sensu alienius esse versificatore. Sed cum insanabilis ille per omnium hominum ordines, aetates, & sexus ita pervaserit morbus, ut facilius oſori nigro, quam homini occurras, qui non aliquando dementiam suam in versibus faciendis declaraverit; & cum in primis hoc insaniae genere venerabilis antistitum ordo ita antecellat, ut plura ab illis, quam ab universo hominum genere, effusa numerentur carmina, quid inhumanius, quid durius, quam hanc à me mihi & illis voluptatem extorqueri? Noceat licet morum integritati, corrumpat vitae sanctitatem, augeat à natura insitam fingendi & mentiendi libidinem petulans poëtici ingenii luxuries; capiant furiosi vates supra modum & fidem loquendi consuetudinem; dediscant mortales humane loqui & cogitare: relinquatur tamen viris gravibus & severis, qui
fe

se à vino & comissionibus, ab alea & omni ludicrorum genere, tamquam à nefaria temporis jactura segregarunt, haec unica otiosi temporis oblectatio. Blandum vocent & furtivum, quibus est vena malignior, venenum, quod se tacite & occulte per omnes vitae & muneris partes diffundat; non invidemus tamen sacris oratoribus, quos à liberae eloquentiae lenociniis exclusimus, hanc unicum sui admirationem commovendi facilitatem. Consueta & contrita plebejo usu vocabula in puerorum praeceptoribus; communem dicendi normam in lectoribus & cantoribus; ex praescripto recitandi sententias vulgatissimas facilitatem in aegrotorum & miserorum consolatoribus, laudamus. In infantibus, mulieribus & idiotis, ab omni Poëticae laetitiae sensu alienis, quotidianas & certis conceptas verbis precandi formulas, quae, ad fastidium usque & satietatem repetitae, ad patrem nostrum in coelo temere ejiciuntur, toleremus. Vos, Deorum ex sanguine generati Poëtae, quos aurea coelo connectit catena, & à limosa terra ad aetheros ignes pennarum remigio sublimes rapit Piërium & Phoebeum oestrum, allegetis potius amplissima verborum dignitate commendabiles preces & vota, ad tremendam numinis inaccessi majestatem, ad terribilem agminum & exerci-

tuum Deum, qui lucem mortalibus non adeundam habitat; qui in excelsissimis coeli palatiis domicilio collocato, nubibus volucris & nimboris, ut solo inambulat, illisque ut curru triumphali, per aëra invehitur, eisdem ut magnifica & splendenti veste amicitur; Qui caput lumine, cujus adspectum nemo sustinere potest, radiatum, velut flammanti diademate circumdat. Qui regalem & coruscantem thronum posuit in supremis coeli tabulatis, pedibus vero terrae ut scabello innititur, & solo ingrediens caput inter nubila abscondit. Cujus folium centies & millies centena millia satellitum, & innumerabilis ministrorum frequentia stipat. Cujus gloriam piceae noctis densissima caligo, & rutilantis diei lucidissimus splendor, siderum & stellarum exultantes chori, mirifico concentu enuntiant & enarrant. Cujus horrida voce coelum, terra & maria concutiuntur & tremiscunt. Ex cujus ignivomo ore flammae omnia devorantes emicant. Ad cujus denique tonitrua montes subsidunt & eliquescent. Hunc cine ego animae humillimae & ad terram semper adfixae subitum in altissima volatum deprimerem, qui toties ad Poëtas dithyrambicos me adgregare studens, vertice sublimi sidera pulsare adfectavi? Hanc in precando pompam & magnificentiam Poëticam gravarer, qui
fae-

saepissime inter tot sonora Dei cognomina, & cum-
latos, quot neque in Orgiis Baccho Maenades incla-
mabant, titulos, tanto horrore perculsus obstupui,
ut omni sensu orbatus, quid deinde reliqua precatio,
non minore spiritu eruētata, à Deo tam horrifico con-
tenderet, plane non intelligerem? Egone his deliciis
à puero infatuatus, in Poëtico buccinatore voces nova
forma percussas, & sesquipedalem in modum ita ex-
tensas, ut vel una aurem implere possit, reprobarem?
Egone innutritus figuris, & tralationibus audacissimis,
à grandiloquentissimo praecone non omnem verborum
vilitatem & sententiarum humilitatem ad plebem de-
legarem? Immo vero ego adhuc in Homeri, Virgilii
& Nasonis mei elegantissimis haerens, & circa verborum
corticem oberrans, à divinis vatū interpretibus di-
scere dedignarer, qua via & ratione in abdita & ab-
scondita sub vocabulis mysteria penetrarem? Quis e-
nim nostrum, qui sine ulla religione Poëtas tractare
solemus, suspicari umquam potuisset, nisi poëtici divi-
nae doctrinae antistites praeivissent, longe alia fuisse
Trojanae & Romanae urbis fata, quam vel vulgus ex
commentitiis & absurdis fabulis, vel doctissimi inter-
pretes ex Heraclidæ Allegoriis, vel Fulgentii Continen-
tia Virgiliana sibi finxerunt? Quis adfirmare umquam

ausus fuisset, Israëliticæ & Christianæ ecclesiæ imaginem, Iliade, Odyssæa & Aeneide adumbrari? Quis, nisi gravissimi omnium temporum Praefules praemonstrassent, in animum inducere sustinuisset, Virgilium in divina illa Ecloga quarta, sub Salônini nomine, Christi natales, & temporis beati reparationem praecinuisse? Quis Ovidium in elaborata illa, & omnibus coloribus expressa aurei seculi tabula, depinxisse principis humani generis Adami integritatem & excellentiam? Perpetuum illud & aeternum ver, pulcherrimam in viridario coelesti semper florentis innocentiae esse effigiem; cujus spatium cum Jupiter, labente in deterius homine, contraxerit, & annum in quatuor tempestates descripserit, quatuor simul omnium, quibus duraturus est orbis, temporum decursus praesignificasse. Ver jam imminutum, brevem illum & caducum humanae felicitatis florem; Aestatem ipsi proximam, inflammatum in omnes libidines & flagitia hominis aestum; Autumnum, maturitatem & plenam, per frugiferum Servatoris adventum, ubertatem; Hyemem denique ultima illa, quae nunc vivimus, tempora, quibus omnia pietatis & sanctitatis studia frigent & congelant, designare. Jovem in terras delapsum, ipsam exprimere Dei tremendi praesentiam, qua Lycaonem, Cainum
no-

notum feritate parricidam , ejusque sequaces , lupos
verius quam homines , dignis suppliciis adfecit ; vel
potius , quia sub humana imagine terras lustrasse cani-
tur , esse verissimam Christi figuram , qui inhospita
luporum , id est , ipso interprete , Phariseorum &
Scribarum testa subierit. In Deucalione Noachum ,
in Apolline , mundi oculo , omnia illustrante , & ser-
pentem immanem , oracula divina obsidentem , telis
conficiente , praenuntiari solem Justitiae Christum , lu-
cem omnibus gentibus salutarem , medicum simul de-
speratae salutis hominum , & sibi adversantium perditore-
rem ; qui antiquum illum anguem , Daemonum prin-
cipem , telis justitiae & verbi sui interemit. In tripode
Christi corpus , humanam naturam , & divinam po-
tentiam ; in cithara , quae chordis tenditur , nervos
Christi in cruce expansos , quibus tristes & damnati
mortales exhilarantur , latere. Totam denique , ne
singula evolvam , Metamorphoseôn seriem esse manife-
stam praeteriti & futuri temporis designationem ; & lon-
ge aliud quid , quam literae & verba indicant , nota-
re ; & in Nasonis non minus , quam in Cajaphae men-
tem vaticinandi vim se insinuassee. O incredibilem a-
cuminis Poëtici vim ! O stupendam veri per tot um-
bras & nebulas perspicientiam ! O inexhaustam inge-

niis acuendis materiem ! quae in minutissima sacrorum vatum carmina immensae molis & ponderis commentarios nobis quotidie producet. Tene ego sacris concionibus ejectam, tene ego ad otiosos & nugaces versificatores relegatam vellem ? Immo vero, cum tam benignam te mihi, tam facilem hodie te, diva Poësis, omnibus praebeas, ita precor, ita voveo, ut dulcissima insaniae tuae omnibus in Academiis, templis, concionibus, coetibus, libris & sermonibus vestigia impressa relinquere ne desistas.

Sed mittendos tandem majorum gentium Doctores, tempus, quod prae furore nihil sentienti fere effluxit, admonet; & satis jam mihi divinos vates propitiatos, aeternamque me ab Antistitibus, quod tam liberali animo meas ipse damnaverim & ejuraverim artes, gratiam iniisse confido. Major mihi & justior à conscriptis Juris prudentum Patribus metus injicitur: non enim ea docilitate, qua divini juris interpretes celebrantur, humanarum legum sequestros censerī novi. Principatum etiam inter illos tenere non ignoro, qui prae fracte & pervicaciter, omnia humanitatis studia juris scientiae indissolubili nexu socianda esse, pertendunt; nec facile hoc Palladium, aut Diomedea vi, aut Ulixeo dolo sibi eripi patientur. Immo familiam inter eos ducere scio,

ſcio, qui non modo hiftoriae veteris lumine obſcuras legum latebras ſemper eſſe illuſtrandas, ſed ipſum juris Romani ſtudio (en quo pervenimus!) nobiliſſimam antiquae hiftoriae partem eſſe diſcipulis perſuadere conantur. Quos neque Papiniani dignitas, neque Ulpiani auctoritas, neque ipſius Juſtiniani, glorioſiſſimi imperatoris, majeſtas deterret, ut à ſacraſſimo legum codice Criticas manus abſtineant; qui in ſingulis literis, verbis, & interpunctionibus dies nocteſque habitantes, ſua opera omnes formoſiſſimi corporis mendas elui poſſe jaſtant. Hos tacitus praeterire decrevi; deſperatis enim medici negant remedia eſſe adhibenda; & ipſe praeter modum extimeſco, ne injecta manu me, non modo ut emanforem, ſed ad viliores artes transfugam reprehendant, & interdicto mecum contendant. Sed ſi jam Academiis excludar, ad forum viam obfirmabo, ubi facile legulejis & pragmaticis, qui glorioſae vocis ſubſidio miſerorum fortunas defendunt, perſuaſurum me puto, ne lucroſam illam & honoratam artem per ingenuarum contagionem extabefcere, & ad mendicitatem projici patiantur. Nec tamen omnis ſpes ita evolavit, ut nullos ex Academicis patribus in partes trahere deſperem. Contractae certe & compendiariae Jurisprudentiae doctores, ſi jam non mei

sint, nullo negotio conciliaturus esse videor: hos enim, cum ad nudum linguarum & Eloquentiae nomen toto corpore exhorrescant, & sua sponte nullam umquam humanioris disciplinae partem attigerint, & omni conatu discipulos ab ea dehortentur, exsultaturos spero, ubi inter ipsos literatores, me facilitatis & laborum fugae patronum se reperisse triumphabunt. Hos, si à Graecae linguae usu deterrere vellem, idem foret, ac si, ne Lapporum aut Finnorum linguam, unde nullum sperari potest lucrum, addiscere vellent, rogarem. Si promptis & ad quotidianam garrulitatem paratissimis magistris, munditiem & exactum sermonis Latini nitorem commendare vellem, non plus proficerem, quam si Sarmatas & Pannonios à Gothicae vel Lango-bardicae linguae facilitate ad Ciceronianam dicendi molestiam transferre conarer. Ad eloquentiae studia, & dicendi scribendique exercitationem, vos, Juris brevissimi candidati, excitare nihil attinet; cum ex hac Academica cavea evolantes, non humanos sonos edere, sed picarum ritu conviciari, aut canina verba latrare; nec sincero, sed cum omnium gentium & nationum fecibus commixto, sermone chartas inquinare promississime discetis. Ad Historiarum & veteris memoriae immensa spatia vos excurrere juberem? quorum ipsi

magistri, & securae navigationis gubernatores, numquam ratem Juris Oceano, in quo tot brevia, tot scopuli, committere sunt ausi, sed clausis in piscinis, & lacubus, cymba tantum ludere cum discipulis consueverunt. A Critica temeritate non modo Professores, omnem dijudicandi vim conviciis proscindentes, sed in primis recocti in foro proclamatores vos facile revocabunt, qui execranda Criticorum capita tot diris devovere solent, eosque quotidiana criminatione falsarum & corruptarum tabularum ex Lege Cornelia reos agere non desistunt. Qui judicum auribus occlamare non pigrantur, Criticorum audacia leges, quae certae & definitae esse debent, convelli & everti; omne jus, bonum & aequum deleri, &, nisi modus huic temeritati imponatur, brevi omnia jura dubia, incerta, & judicum religionem solutissimam fore, non vane ominantur. A Poëtico furore illos, qui praeter alios Prudentes appellari adfectant, retrahere nihil est negotii: Ab hoc enim mentis vitio alienissimi semper habitus legum conditores & interpretes, qui, cum omnem ingenii vim & mentis aciem in enodandis legum laqueis, in torquendis in causam suam Principum & Senatum decretis, in prudentum responsis dubiis & perplexis excutiendis, obtuderunt & consumpserunt, nihil fere sibi

caloris & impetus effundendo carmini superesse deprehendunt. Nam ludere & joculari eos, inter facilioris Jurisprudentiae doctores, credatis, qui Poëticam & Poëtarum veterum meditationem Romani juris studio faciendam esse clamant. Ne credatis ex animi sententia, res tam diversas, & tam longo à se spatio disjunctas illos in unum velle conducere; sed haec, dicis causa, ut ipsi amant loqui, & quia aliud, quod dicerent, non habebant, in populum ideo effundere, ut gloriosis illis literarum & eloquentiae magistris vices reddant: solent enim illi, ventoso Cicerone non minores spiritus gerentes, se quoque triduo profiteri posse Jurisprudentiam, praedicare. Non absurde ergo, nullis umquam sacris Poëticis initiati, sed callidi juris scholastici interpretes, se quoque, si stomachum illis literatores commoveant, repente invitis Musis, Apolline irato, Poëtas prodire posse, ostentant. Nam tritam illam literatis ad carmina viam numquam ingredi dignatos, nec vanam Poëseos laudem & gloriam eos vehementer adfectare, versus domestica incude effecti, & metu legis Fabiae, nullo colore antiquitatis tincti, aperte declarant. Relinquite ergo, & velis remisque fugite, Themidis aureae alumni, pannosas famelicorum artes, & ad quaestuariam causidicinam (ignoscite ver-

verbo vobis vernaculo) omnes nervos intendite, mihi-
hique, quod tam fructiferi & salutaris consilii auctor
existiterim, vel potius compendiorum inventoribus,
qui vos uno saltu ex ludis literariis in amplissimam
curiae & fori lucem transtulerunt, aeternas gratias de-
bete.

Si vero ab ullo eruditorum ordine mihi gratia sit in-
eunda, vester, o salutis humanae praesides & conser-
vatores, favor & benevolentia accuratius nunc mihi
esset concilianda. Et nisi ambitio, qua me tam studio-
se in priorum classium amicitiam insinuare tentavi, tem-
pus eripuisset, longa oratione tam sedulos salubritatis
nostrae custodes delenirem. Ostenderem, nihil esse
importunius, nihil crudelius molestis illis literarum
magistris, qui incolumitatis publicae vigiles ab operosa
illa arte, quae nec dies otiosos, nec noctes quietas con-
cedit, ad nugaces & vitae humanae inutiles doctrinas
avocare student; & humanitatis commentitiae Profes-
sores, qui sectae suae otiosis oblectamentis occupatissi-
mos interpellare instituunt, non de illis modo, sed de
universo orbe pessime mereri. Vacabitne vobis, Ae-
sculapii & Hygiae sacerdotes, quibus nec ad cibum,
nec ad somnum capiendum tempora supersunt, ad
Grammaticorum tricas oculos adjicere, ad pueriles de

vocabulis, & ridiculas de minutissimis rebus contentiones mentem adplicare? Novi multos Graeci sapientis dictum jactare, *si non essent Medici, nihil ineptius Grammaticis fore*. Sed si quid salis, aut veri in trito dictorio insit, in eos unice Medicos, qui inutilibus artibus eruditos se ostendunt, congruere existimo: & nihil ineptius esse Medico, linguarum docto, eloquentiae studio se efferenti, in Historiarum scientia curioso, & Poëtices illecebris depravato, consentire possum. Quicumque enim duo certissimae artis principia & fundamenta, jam ab Hippocratis aevo jacta, Rationem & Experientiam esse fateatur, illico & facile ineptissimum esse medicum, qui ullam temporis partem in humanioris studii meditationem infumit, negare non sustinebit. Ad rationem excolendam & perpoliendam, quid, quaeso, artium, quibus nulla constat ratio, studia conferre possent, cum & furdorum & mutorum mentibus incredibilem sollertiam ingeneratam miremur? ad usum confirmandum, quid confusa & imperfecta linguarum cognitio faciet, cum indoctissimos & rudes aptiores sanandis morbis vulgo judicari, & longa remediorum experientia famam & auctoritatem sibi invidendam constituere, quotidie videamus? An cariosa veterum monumenta, humani corporis machinam,

nam, ejusque infinitos artus & membra, quae manu tractare, oculis scrutari debet medicus, pernoscenda dabunt? an improba & vehemens librorum lectio, usus & experientiae, quae ipso opere & exercitatione confirmatur, copias ministrabit? An peregrini sermonis ubertas, morborum consequentia principia & causas, earumque progressus docebit? an haec omnia non potius memoriam, fidelissimum illud omnium artium adjumentum, infirmabunt? Si enim Medicinae cultor per omnem vitae cursum nihil ageret, nisi morborum, vitiorum, seminum, herbarum, radicum, metallorum, medicaminum, potionum, & infinitae suppellectilis, quibus tabernae & apothecae armantur, nomina edisceret, centesimam illum partem vix exhaurire posse constaret. Quis ergo, nisi molestus paedagogus, flagigaret, ut plenum jam & constipatum illum thesaurum immenso omnium linguarum & vocabulorum pondere magis magisque oneraret? Quis congerere eodem reliquias veterum populorum, regum & ducum res gestas, opera belli & pacis, leges, mores & instituta, sacras, civiles & militares antiquitates juberet, nisi qui occidere conservatores generis humani vellet? si quid vacui in tam sani cerebri hominibus remaneat, magna satis quotidie novarum pestium & remediorum multitu-

tudo emergit, quorum omnium appellationes qui in ore & mundo habere potest, nae ille ipsum Simoniden memoriae divitiis provocare potest. Eloquentiae magistro se formandos traderent Medici, qui mutas & elingues per omnem aetatem se artes exercere profitentur: quorum mentibus verissimum illud ex Apollinis tripode responsum semper obversatur, non verbis, sed manu, non sermone, sed opere morbos sanari. Quam invidenda vobis, illustres Phoebæ arte viri, dignitas contingit? quam longe oratoribus, & ceteris eruditorum ordinibus antecellitis? His nulla auctoritas, nullum pondus, nisi quod magno verborum ambitu & pompa conciliant: vobis sine sermone, etiam antequam loqui incipiatis, fides habetur. Ubi vero os aperitis, non homines verba fundere, sed praesentes Deos oracula edere, omnes nobis persuademus. Mercurium, facundum Atlantis nepotem, eloquentiae parentem & conditorem, quem primum voce homines formasse Poëtae jactant, vobis solis, etiam sine linguarum sacrificio, propitiare datur. Caduceum, inane illud & inefficax blandae & fallacis orationis argumentum, algentibus oratoribus porrigit; vobis, ingentium divitiarum sponzor, extensa manu & inclinato corpore gravem nummis crumenam jactat & ostentat.

Va-

Vafrum Deorum & hominum interpretem, aureos montes mystis suis pollicentem, vos, Hermeticorum arcanorum antistites, veneremini. Huic in triviis, quae pererratis, huic ad januas & thalamos, ex quadrato marmore statuas erigite. Huic Deo arae perpetuis ignibus collucescant, votis & precibus nuncupatis; ut artes, strophas, & honesta furta, ingenii & sollertiae certissima documenta, sine invidiae aut calumniae metu fortunare velit. Minervam, non bellatricem, aut hasta & Aegide terribilem, non lucubrantibus infaustum noctuae comitatu omen, sed Cecropiam, Medicam & Hygieam, quae, projecto scuto, deposita cuspide, ablegato bubone, Aesculapii insignibus decorata, & serpentis sibilis blanda & indulgens, nihil agentibus, immo dormientibus remedia monstrat, adorate. Mendicantes Musas, & anili virginitate, quia dotem & maritos reperire non potuerunt, despiciatissimas puellas, ut pestes, vitate; & ipsum Poëtae titulum cane pejus & angue odio habete, ne imperitum vulgus magicis carminibus Daemonia, corpus humanum infestantia, expellere vos calumniatur. Sonora & numerosa harmonia & concentu se hominum mentes fascinare Poëtae stultis persuadeant; vos chori Clinici quotidianam miserorum auribus cantilenam infusurrate,

quae certissima salutis spe facta, ex tenacissima Eudionis arca nummos excantet. Secessus & sola loca, in quae, ut insaniam atra bile commoti Poëtae augeant, & miseras montibus & sylvis tenera & delicata quærela narrent & deplorent, se abdere solent, effugite. Museum, in quo, ut claudi sutores, totos dies steriliæ artium cultores desident, araneis & muscis incolendum relinquire. Coetus mulierum, conventus hominum celebrate, per urbem concursando, vias easdem iterando, aegrotorum cubilia perambulando, non linguae aut oris, sed manuum & pedum ministerio famam & nobilitatem in ultimas orbis partes propagate.

Finem dicendi jam facere sine ulla reprehensione liceret, & ultimam eruditi chori classẽ silentio præterire. Præterquam enim quod multa jam aliis dicta in suam causam interpretari possint, quid apud sapientiae Professores, qui sua se virtute involvunt, & nihil extra se quaerunt, oratio mea efficere poterit, quod non ipsi & sua sponte efficere consueverunt? Nobili artium fastidio, absolutissimi naturae interpretes, & omnis literaturae contemtionẽ humilitatem, ad quam præter meritum, ut capite censi, detrusi estis, compensate. Pythagorae, cujus dicta Pythiis responsis erant veraciora, vestigia premite; qui rogatus, qua maxime

xime arte confideret, nullam se fcire respondit, sed esse Philosophum. Et licet numquam paupertatem expugnare, & detrita pallia purpuratis vestibus mutare potueritis, titulo tamen & magnifica appellatione, quasi unici sapientiae & virtutis studiosi, supra omnes capita extollite. Invideant & subducant vobis auditores omnium disciplinarum Professores; invadant licet in possessiones vestras primorum ordinum ductores, & perplexas de Deo & Mente nostra disputationes, colorato ad doctrinam suam titulo adgrent, & ad religionis securitatem subtilius & certius se enodare posse jactent. Veram se, non simulatam, Philosophiam profiteri glorientur Juris prudentes. Rerum causas & principia se non ex confectis originibus, sed ipso opere & usu cognoscere & perspicere Medici mentiantur. Irrideant vos & per ora hominum traducant dicacis eloquentiae institores, & Poëticae urbanitatis scurrae. Vos domi vobis plaudite & exultate, quod illa, quam profitemini, disciplina, sit omnium artium parens & procreatrix. Ingratas & inofficiosas filias, quae origine sua erubescunt, abdicate, & omni sapientiae hereditate in aeternum private. Memores aurei dicti, *qui beatam vult vitam vivere, philosophetur*, adventitias & auxiliares literarum copias, ab instructissimis horreis

removete. Antiquas scilicet Grammaticus vobis linguas commendarem, qui quotidie novas vobis formatis, & nauseam deliciis vestris nobis moventes, sermonem excuditis, quem neque Graecum, neque Romanum, sed ex utroque mixtum, vernaculum & dominatum quis dicat, & qui tamen terrarum orbem implevit. Ex foetentis Ennii stercolinio, ex olido Pacuvii fimeto, vos, rerum non fabularum auctores, aurum colligere juberem, qui ex splendidissimis Platonis & Aristotelis gazis lucidissimas gemmas depromitis, quarum luce & splendore omnes mentis tenebrae discutuntur. Ad Rhetorum vos scholas ablegarem, qui quotidie vobis apparere omnium artium, & sanctae in primis Eloquentiae janitricem, Logicam video, quae omnes aditus ad inveniendi, partiendi, & disputandi facilitatem recludit, & magica quadam efficacitate pueros, paullo ante elingues, de rebus, quas nondum intelligunt, ignoto eruditis sermone promte garrere docet. Ad ornandi & amplificandi praecepta ego vos demitterem, quibus divina illa disceptandi magistra Dialectica, tot acumina, tot captiones, tot connexas conjunctiones, tot laqueos, quibus mentes irretiuntur, subministrat: ad Ciceronis de Oratore & dicendi arte dialogos, ad pompam magis & splendorem, quam

quam utilitatem nullo ordine & ratione effectos; ad scepticas & sinuosas Fabii institutiones Oratorias vos abire juberem, qui ex Cleanthis apotheca & Chryssippi lecythis fucos, & fallacia magis & colorata pigmenta profertis. Historias ab origine rerum, regnorum ordines, rerumpublicarum vicissitudines vobis enarrarem, qui ante mare & terras, quid factum fuerit, vel fieri potuerit, mente vestra formatis. Per orbem terrarum, ut quid agant homines cognoscatis, circumducerem, qui mentem & oculos in coelo defixos tenetis, & alios invisitados & inauditos annalium conditoribus orbes, montibus, silvis, fluviis, urbibus, & incolis instructos, digito demonstratis. Ad insanientis & otiosi ingenii oblectamentum Poëticen si jam abducere vellem, nulla ratione possem: ita enim omnem fingendi & praeter veri speciem nova excogitandi vim consumsistis, ut materies carmini fabricando deesset. Tantam quoque & tam illustrem ex commentitiis rerum causis famam reportastis, ut vel unius sectae Philosophicae auctor omnes omnium seculorum Poëtas & fabularum architectos obscuret. Stultis & populo persuadeant vaticinantes Poëtae, divino se furore & aethereo spiritu adflari; unusquisque vestrum se Sapientem illum, sola mentis cogitatione formatum, Deo aequalem esse venditet, &

uni-

universam Philosophantium chorum Deo, rerum opifici, consiliarium & adiutorem adsidere jure gloriatur. Hanc universi machinam vos construxistis & fabricastis; semina & ortus rerum, vestra manu jacta, excitastis; principia coeli, terrae, & maris posuistis, & illo, quo conspiciamus, ordine conservatis. Denique, quod nulli eruditorum ordini contigit, licet sapientiae adversarii & detrectatores calumnientur, nihil adhuc esse reperi-
tum, in quo industria futuri seculi acquiescat, aut in-
nitatur, nihil tam absurdum esse, quod non ab aliquo Philosophorum sit dictum, nullus tamen inter discipli-
nae vestrae conditores & principes extitit, qui non se-
ctatores innumeros invenerit, & familiae nomen suum
imposuerit. Tueamini ergo acriter, sapientes, locum,
& in gradu constanter state. Si antiqua dogmata & sci-
ta tempore exolescere, & à recentioribus aboleri vi-
deatis, nova & inaudita ab integro comminiscamini.
Perniciosam modo literatorum societatem vitate, &
si ad summas & curules eruditorum sellas, quae vobis
debentur, adspirare non permittatur, ex illo certe, in
quem olim sine ullo fastu irrepsistis, artium liberalium
ordine, ne pestis in hirsuta pectora serpat, omnis ele-
gantiae & politioris doctrinae magistros deturbate.

Sed concludendam esse orationem, & fatigata tam
longo

longo fermone patientia vestra, A. nihil superesse video, nisi ut brevissima peroratione juventutis animos, collectis & in unum contractis argumentis, ne pestilenti illo fidere se adflari sinerent, admonerem & exhortarer. Sed si Doctoribus plane persuasero, inutiles & calamitosas gravioribus disciplinis nostras esse literas, quis invalidas jam dicendo vires in turbam discipulorum vehementius excitandam, me exhaustire suaderet? Ut armenta pastoribus, qui illis imperant, ita vos, o dociles & cerei animi, praeceptoribus obtemperare novi. Si tamen rari inter vos, in verba magistrorum jurare non soliti, reperiantur, nullus metuo, ne hac in parte ab eorum dictatis discedentes, mihi adversemini. Si tamen rationes meae & argumenta nihil efficere, nec ipsa artium nostrarum vilitas & damnosa contagio vos ab earum cultu detertere poterunt, spectate, quaeso, ad praemia & honores, illiteratis & humaniorum artium contemtoribus posita & persoluta. Haec ut consequamini, auctor & impulsor vobis existo, ut hunc per Academias, non dicam cursum, sed volatum magis magisque corripiatis; ut praeteritis Sirenium scopulis & insidiis, blandis Literatorum & Poëtarum cantibus aures obstruatis: & praevecti vada & breviora, quae latissimus Historiarum & Antiquitatum pontus

occultat, ad portum illum, omnis laboris & industriae finem & requiem, Doctoris titulum, remis & velis festinetis. Tunc non modo negligere omnem antiqui sermonis curam, & variae eruditionis ex memoria vestigia, si qua supersunt, delere, sed ipsius etiam doctrinae, cujus insignibus decorati estis, oblivisci vacabit. Ne tamen nihil egisse vos in Academiis, & pecuniam doctrinae auctoribus & instrumentis destinatam, inutiliter profudisse parentes & amici crimentur, ut periculum faciant in alea & ludicris, in calido & vino potando, in comissionibus nocturnis, & grassationibus, in saltatione & concinno membrorum motu, in vestium & capillamenti decora compositione, rogate: & sollertes vos praestabo. His artibus & dotibus, quas ad histrionum & artificum, non Professorum dictata exhibebitis, admirationem popularium excitate, qui immundos & mucosos pueros, tam nitidos & elegantes Doctores in patriam ex Academia remeasse, gratulabuntur. Civium non tantum, sed illustrium & principum virorum gratiam & favorem contemnendo & fastidiendo priscas linguas, & scholasticam doctrinam infamando, conciliate. Honores & magistratus strenue ambite, & ad eos viam, dissimulata Latinae linguae intelligentia, facili-

cilitate & nitore linguae Vernaculae, & ante omnia Francicae venustate & lepore munite. Ad hanc toto pectore incumbite: in hanc non modo remotissimae antiquitatis monumenta transfusa, & fidelissime consignata, sed omnium artium & scientiarum mysteria se in Francorum mentes & volumina insinuasse persuasum habete. Hinc ubi uberem & perennem colloquiorum in circulis & conviviiis materiam paraveritis, temporis in Latina lingua addiscenda collocati jacturam, lacrimis numquam inarescentibus & aeterna querela deflebitis. Monumenta Graeca, & Latina opera, ab hirsutis & incomitis parentibus olim effusa, aversemini; sed eadem, nunc elegantia & cura interpolatorum nitidiori, & moribus seculoque cultissimo magis congruenti amictu, commendata, summa cum admiratione versate. Patrios annales & aviti temporis Historias, olim à Meursiis, Grotiis, Vossiiis, & nescio quibus, sub crasso Batavorum coelo natis, ineptis & servilibus veterum imitatoribus, barbaro sermone in peregrinorum usum proditas, ad tabernas, ubi salsamenta & aleces venduntur, projicite. A politis & comitis Veneris & Cupidinis nepotibus, qui insigni mentis subtilitate & ingenii felicitate omnibus Europae nationibus antecellunt, non modo naenias amatorias, & fabulas

Milesias, matronarum & virginum nostratium etiam suavissima oblectamenta, avide accipite; sed reipublicae nostrae formam, leges, instituta, & fata, non à conductis modo librariorum operis properata, sed à publica largitate auctoratis Declamatoribus, peregrina quidem, sed apud honestos jam pervulgata lingua, elaborata perlustrate. Admiremini mecum, nihil his inquilinis coeli nostri stuporem & frigus, nihil paludum nostrarum nebulosas exhalationes, ex ingenerata alacritate & vigore detraxisse, sed fastidiosos illos barbariae & horroris Graeci & Romani domitores, ita in mores nostros, licet à linguae incultae scabritie abhorreant, transiisse, ut ejurata adfentatione regia, dicacitatis popularis & satyricae licentiae tyrocinia, stupente tota Gallia, deponere non erubescant. His delicatae pronuntiationis arbitris, qui in expoliendo agresti Batavorum ore tantum laboris, & sudoris impendunt, hanc saltem gratiam referre, ut ne horrendo Belgicarum vocum sono & inamabili stridore aures tam teneras radatis. Exoleti sermonis inimicis, & doctarum linguarum everforibus plenam fidem habete, Romanam, perdiscendi difficultate & molestia odiosam, dudum ab elegantioribus viris neglectam & contemptam adseverantibus; eamque, ut exiguam & vilem scholasticae eruditionis portiunculam,

ad

ad paucos paedagogos, tristes & morosos, esse relegatam. Francicae vero tantam esse facilitatem & suavitatem, tam illustrem celebritatem, ut cum per omnium jam virorum coetus, per muliebria senacula pervaserit, spem non vanam novae eloquentiae architecti conceperint, illā non modo curias & fora, sed omnes Academiarum cathedras brevi personaturas: & ipsos Humanitatis antiquatae Professores, nisi moribus seculi nitidissimis obsequentes rusticitatem ejurent, ad ludos literarios, in ultimo Septemtrione & Moscovia excitatos, brevi demigraturos.

D I X I.

